

福建列傳卷二十三

明七

鄭餘慶字崇善閩縣人正德丁卯舉人授定海知縣嘉靖初日本因入貢構隙餘慶繕城隍嚴備禦歲大疫捐俸市藥多所全活至冬大祲陳荒政十事不待命先發廩賑庭羸者又為建閘作硤廣溉民田以勞卒於官餘慶少孤奉母高至孝大母欲以先業多分叔父子餘慶請於母承志弗違舅氏以屋售既與直百金矣母色不怕餘慶即以券還舅士大夫義之私諡孝恭

陳談字允默長樂人正德戊辰進士官刑部郎中奉命慮囚權貴人以私請且脅之談曰國憲可斂邪請者慚屈武宗將南巡談偕同官苦諫被杖瀕死出為兗州知府振窮懲蹇以病乞歸道卒子豪字志興嘉靖壬辰進士授新昌新昌有三知縣以卓異召拜御史諫復河套亦被杖久之為副使以病歸

福建列傳明七

陳伯諒字執中福清人正德戊辰進士按舊志云與李夢陽鄭善夫等號稱十才子合天下為言無伯諒名王應山風雅叢談授富陽知縣調崇德所稱善夫及林鉞等十才子就福州言亦無伯諒名政尚嚴簡而善措置民不知擾抑豪強禁健訟期年境內肅然以最入為御史三疏劾劉瑾皆不報督學兩京首拔楊維聰於諸生後維聰廷試第一士服其知人遷四川提學副使未上卒子一科字子泉嘉靖甲午舉人

應山知縣

王大用字時行莆田人其先江南儀真人以戌籍隸興化衛為莆田人正德戊辰進士案朱彝尊經義考引人物考云大用南直隸興化人非是進士題名碑錄王大用下注云福建興化衛籍南直隸儀真縣人授都水主事督造漕船兼筦臨清閘五年劇賊劉六等攻破濟寧直趨臨清大用率壯勇據險迎敵賊解去七年轉刑部員外郎十二年擢廣東按察司僉事備兵清遠其地阻隘積為盜區大用樹威德簡士卒嚴賞罰號令一新樂昌盜高快馬偽稱口口流劫湖南郴永諸州郡朝廷命合兵討之大用率兵直擣巢穴馘首功一千四百有奇湖廣武昌民與樂昌民

相讐湖廣當事者以爲劇盜議盡殲之大用力持不可樂昌民自擒十六人以獻餘悉不問民感戴立生祠焉清遠猺橫不可制大用卽率師渡潯江破其砦戮賊首梁永寬等移攻黃藤峽諸處戮賊首唐鎮山僞都督楊旺等新會白水諸洞依山負海與新興海州諸峒相煽亂大用躬巡邑治授方略令里胥父老各捕所知甫三月獲賊二千四百有奇十四年聞宸濠反卽勒兵冒暑倍道而進至則宸濠已就擒王守仁欲上其勤王功力辭而去順德增城香山沿海多盜蹤跡奇詭大用徧歷其境發隱搜匿獲三千餘人十六年就遷副使備兵如故嘉靖二年征白水黎蠻明年又征嶺西高涼峒夷獠先後有功尋改江西參議奉表北行於權貴一無餽遺多銜之四年考察言官承風旨言其治盜太酷調貴州時軍旅繁興採使旁午大用處之裕如六年擢廣東右布政八年轉左尋遷應天府尹累擢副都御史巡撫大同大用未第時曾遊其地習知其風俗至則尙教化禁淫酗節浮費汰冗食令墾耕以資芻粟嚴開中以通商鹽旋勦平強寇劉

福建列傳明七

二

善果因疏陳備邊四事罷按狀變羅買革守備減哨備又言臣待罪行間得徧覽諸鎮他鎮邊垣離鎮不遠易於候望惟大同之大邊離鎮二百餘里二邊亦一百三十里三邊稍近四十里而游徼偵卒恐遠覘爲敵所獲輒伏匿近地以故牒報不實其偶爲虜生致者又盡以我軍虛實告之且士卒月廩必具轉車人徒齎至大邊率二石致一石而爲區脫及虜獲者不與焉合移入二邊併力爲便奏下兵戶俱報可尋命整飭薊州兵備兼巡撫順天值歲大饑奏給銀米數萬軍民賴以全活併修築邊牆假工行賑兵部會議防勦事宜大用復疏三事曰重賞罰曰酌律例曰覈功次帝皆嘉納先是御史張祿巡按大同與大用議多不合十一年擢右都御史入掌院事祿摭拾虛事力沮之尋仍爲巡撫朶顏三衛同韃靼假稱貢入關中變大用時在關撫諭卽命叅將周璿蕭升拒敵而單騎入城調兵策應敵遁去時大用欲以金幣與韃靼易馬又令其獻黑谷關地至太平寨互五百餘里可徑爲邊牆二議已定未及請行祿謂啓衅復効大用乃令

致仕歸僑寓儀真七年歸莆田是冬起原官巡撫四川黜墨吏革官舫禁
淨身抑豪債釐茶法定賦役諸所興革咸務大體屬官獲白兔大用不以
表聞遇地震災傷則屢爲陳奏時帝齋祀太乙羣臣爭言符瑞見大用疏
必厭之二十五年升南京刑部侍郎方候代白草番率眾攻破平番堡大
用卽疏請征勦命遊擊曹克新督兵應援斬首七千餘級兵科給事中扈
永通以失事論劾命回籍聽勘代巡撫者張時徹疏大用前功事乃白大
用歸復居儀真以圖史著述爲娛詩才雄氣逸晚頗作玄語三十二年卒
於儀真遺命返葬子邦圻邦圻世所稱王生者也具大用先後勲伐疏請
祭葬贈蔭時嚴嵩父子竊柄諸先臣子姓以恩澤請者非入千金屏不奏
而生橐無一錢久羈京師從里中士大夫句百金以餽世蕃麾不納生坐
舍中作歸計忽一夕世蕃召之至便室與之飲生素嗜酒敢言已而悉如
所請疏下聞者傳爲異事後知嵩嘗召其子語之曰王時行一世偉人且
數著戰功家甚貧爾無以恆調困其兒也世謂如嵩貪婪亦服大用之廉
福建列傳明七

云

陳傑字國英莆田人正德戊辰進士知景寧縣爲政以愛民爲主捕治邑
巨猾陳盪盪賄上官誣傑以罪父老奔走號訴願爲侯死知府劉斐憤欲
挂冠事白抵盪罪傑還任擢南京御史屢疏皆切時政父喪哀毀廬墓嘗
語人曰聖賢實學在辨義利審真僞王守仁稱其篤信好學高潔自守及
卒督學潘璜題其墓曰孝廉先生巡按聶豹施山先後疏請依陳茂烈例
旌表弗果行 以上道光舊志

林文俊字汝英莆田人祖憫有詩名文俊生而穎異家貧無書就書肆閱
之輒成誦弱冠舉鄉試第一正德辛未成進士選庶吉士授編修擢右春
坊贊善嘗兩主會試一主武鄉試精心校閱得人最盛嘉靖九年南京缺
祭酒會推章四上及文俊始充先是帝勅本監校刊二十一史未就文俊
不數月卽校定二十史鋟版以獻惟宋史朝議謂宜改修故缺之帝大悅
每御文華殿指示閣臣曰此祭酒林文俊所校書也十一年改北祭酒充

經筵講官明年三月帝命太學釋奠禮畢御彝倫堂文俊講虞書元首股肱之義帝大悅賜坐宣諭諸生曰治平之道備在六經諸生宜講求力行以資治化翌日文俊率學官諸生表謝賜襲衣寶鈔文俊爲祭酒諸生罔不肅條教雖貴游子不得躐序有一生遇盜稽程法當贖金文俊聞其將鬻子惻然爲捐俸吏議卒免贖十三年擢南京禮部侍郎七月太廟災自劾求退溫旨留之明年改吏部屬尙書缺文俊攝部事以明慎稱未幾卒故事大臣非三載考滿不得蔭子不全給祭葬而謚贈必出特恩文俊爲侍郎未三載所司以請帝以其有編摩講讀之勞特許蔭一子贈南京禮部尙書賜祭葬予謚太常議謚曰良曰恪帝特改曰文修皆異數也文俊玉質矩容吐音若金石以不能俯仰權貴幾爲所擠賴受帝知以免平生清約慎取予不干人以私士論翕然文章亦醇雅雋永如其人從兄典字汝惇舉成化鄉試會試乙榜授冠縣教諭遷西安提學吳伯通稱爲兩浙師儒第一擢鄖陽府教授鄖陽新設郡乏人材典擇其年少質敏者親爲

福建列傳

明七

四

講解士風少振王廣東鄉試調陳獻章與談理奧獻章謂人曰林汝惇天資近道可遠到也以都御史陳清薦擢宜城知縣治爲諸邑最慝遷廣東按察司僉事調山東提督京畿屯田兼管芻餉俄乞歸故廬甚隘別葺小堂曰西翠稽經訂史罕與人接從弟繼賢字啓宗正德庚午舉人任徽州通判徽父老言清官必曰林三府遷寧波同知攝府事不攜妻孥祇一蒼頭給役決獄每得情民復曰林青天繼賢生而眇一目判徽州時郡人汪鉉爲左都御史其子弟怙勢干請一切斷以法及遷寧波丞鉉適爲吏部尙書以目疾入察典去後死倭難

閩書興化府志道光舊志

張孟中字道宗閩縣人父澤字孔仁幼孤自奮於學第成化甲辰進士歷大理寺正獄有當駁者必付回原籍問至再方議駁多所平反遷廣東按察司僉事孟中正德辛未進士授戶部主事時江彬等日導武宗居豹房設皇店爲樂九年正月乾清宮災詔求言孟中應詔疏請開言路親朝政罷豹房御經筵斥番僧還邊軍定國本罷皇店八事詞甚切至轉兵部職

方員外郎復疏六事請崇聖學建儲位通言路戒遊幸去小人正名號帝大怒廷杖之創甚越數月卒於邸舍時年二十有八萬曆十七年孟中孫諸生寵祿持疏草陳請崇祀遂建祠東郊中山之麓

趙德剛字崇節聞縣人正德辛未進士授德興知縣值姚源寇至邑無城伐木爲柵與賊角憲使統兵者欲以金錢啗賊德剛曰賊可賄乎民困可重斂乎身入賊巢諭之被拘以計脫誘致賊黨數十人戮之賊引去歲大饑遣邑耆民蔣喜疏請於朝力陳疾苦得蠲三年賦又請賑金七千餘兩民始獲甦爲立碑頌其德終武昌府通判

朱鳴陽字應周莆田人父文興字世盛事父母至孝喪葬皆出已貲弟請分任之曰吾力尙可爲也朋舊有患難雖昏夜必赴援鳴陽第正德辛未進士授戶科給事中歷禮科都給事中帝數出行幸狎昵嬖人鳴陽疏言大駕時出恐蹈白龍魚服之戒江彬錢寧怙寵恣恩宜正典刑又言前星未耀請選親王可承天序者居京師防意外變不報殿庭災請罷鎮守大

福建列傳明七

五

璫任正人言益愷切世宗卽位大禮議起與張璫不合又疏攻其短乃出爲浙江叅政已坐他事左遷雲南叅議璫罷復故官補廣西未幾遷浙江右布政使汪鉉起爲左都御史勒鳴陽致仕鉉璫黨也閩書莆田縣志

胡瓊字國華南平人第正德辛未進士知慈谿縣公明自持召入試御史以疾歸結廬東溪之濱與二三同志講學疾愈起巡按貴州浙江皆有聲其巡貴州也苗夷作梗捕平之仍請設兵備於雲南需益控制之入掌山西道事嘉靖三年大禮議起瓊與羣臣伏哭左順門被杖病創卒瓊事嫡母如所生家事悉以付弟私室不蓄一錢後都御史陳洪謨備陳瓊等妻子流離狀請卹於朝不許隆慶元年贈光祿少卿以上道光舊志

張鵬字搏南浦城人幼奔父喪兩足俱裂正德辛未成進士授戶部主事督馬廠劾中官私貸影射之弊視光祿寺奏革中官需索奄豎側目擠陷之以楊一清石瑄救免監兌湖廣特請勅而行奏請重臣沿河督漕遂爲制轉郎中督餉遼陽復屯田及沒公鹽課時帝方事巡幸權倖薰灼鵬將

具疏諫時有以諫死者衆沮之鵬曰事危而默不忠約議而悔不信獨詣行在上之值皇太后旨促駕旋事乃寢居二年乞歸養章三上始獲允遂以羨錢萬緡貯庫而歸嘉靖初汪名起用時張孚敬當國聽選者爭先趨謁鵬獨不往一日會於朝房孚敬顧謂桂萼曰若非公故人乎何落落也萼微諷鵬往謝以素性懶慢爲辭居數日補兵部郎中尋遷山東按察副使監司某受賄欲脫二重囚鵬執法不從遂乞致仕歸闢圃粵臺西吟讀其中本邑各坑場歲徵銀課時採取已竭力言於巡按免其稅龍泉山寇迫縣城署知縣梁某惶恸欲自縊鵬主議固守募兵拒敵城獲全年饑聚衆給米活之前後薦舉皆以疾辭卒年八十

林炫字貞孚閩縣人庭樾次子正德甲戌進士授禮部主事改南京兵部言南京祖宗根本地近年軍民困窮日甚宜加撫卹因上陳四事革幫錢釐夙弊卹皂役清馬政厯禮部儀制郎中世宗繼大統炫以議禮忤執政家居久之賓客輒填戶起精膳郎中擢通政司參議未上卒炫詩文富麗

福建列傳 明七

六

與無錫顧可久晉江王慎中及同郡林春澤龔用卿諸人結鶴圃清音社李景元初名孟以字行又字一之侯官人先以會試乙榜爲浙江龍泉教諭正德甲戌成進士授刑部主事有羣氓盜鄰田黍守者覺逐盜反擊以梃及繫獄官坐以劫景元詰得其情爲出死者八人武宗將南巡景元與同官陸倖等抗疏極諫忤旨責跪五日廷杖奪俸旣而遷員外郎宸濠反逮繫數千人眞僞莫可辨尙書薦景元才擢郎中訊囚多所平反嘉靖改元以忠義被獎初武學生朱大周計奏大臣不法逐之去位久而論定欲治大周以朋黨律且及搢紳十餘人景元曰黨事不可興也止擬謫成餘俱不問識者韙之在刑部八年出爲南寧知府鄰郡方用兵給軍餉至數萬處之裕如有富室殺人賄脫誣平民抵死景元曰死者冤矣復以平民償之是重殺人也執不可當道者主前議甚堅忿景元持其短遂註以疾會以母憂歸遂不出 以上道光舊志

林春澤字德敷侯官人伯祖堅字叔玉成化乙酉舉於鄉官廬陵訓導校

浙江鄉試謝遷出其門後復校應天試舟至鎮江有同鄉包生者奉千金爲壽曰某田南監應試乞無見抑堅正色却之祖塋字叔敏武勇過人鄧茂七之亂集鄉社千餘比什伍朝夕巡邏賊不敢窺境父鐸字汝和喜任郵鄉里多厚德春澤正德甲戌進士授戶部主事權臨清關屬武宗南巡諫者皆廷杖罰跪午門春澤抗疏千餘言救之江彬扈從擅威福春澤持正不阿彬爲氣奪坐事謫寧州州同累遷肇慶府同知島寇掠高州檄攝知府事春澤習知兵之害民悉罷遣之代以土著部署方略寇次第就擒擢南京刑部郎中出爲程番知府擇耆德文學士分布夷寨爲童子師臥龍暨通州塞屢失地春澤與安順宣尉司李指揮協謀平復功未上爲忌者所中歸春澤遂於禮經在吉安時與羅欽順講學官南曹復師呂柟究極旨奧蚤歲有詩名與鄭善夫方豪何景明相倡和壽百歲時有司爲立人瑞坊春澤卒子及孫徧拜以謝起走如常又四年卒子應亮自有傳郭應聘撰行畧道光舊志

福建列傳明七

七

劉勲字紹功莆田人父槃字學賢性夷曠不與人校管貸於人已償而人復索槃識其日月甚的其人欲誓以自覆槃遽曰果吾忘之遂重償焉其存心之厚類此勲正德甲戌進士授刑部主事改吏部嘉靖初伏闕抗疏議大禮忤旨受杖已歷考功郎中爲桂萼方獻夫所不喜調南京禮部歷官至四川參政平巨寇李和尚之亂案遷副都御史巡撫寧夏引疾歸林大輅字以乘莆田人正德甲戌進士歷工部員外郎武宗南巡同邑黃鞏與諸臣疏諫帝下鞏等詔獄大輅與同官何遵蔣山卿亦連名上疏極言江彬怙權倡亂鞏等無罪願特寬宥毋使後世有殺諫臣名帝怒並下詔獄俄令大輅及鞏等俱跪闕下五日加桎梏至晚仍繫獄諸臣晨入暮出纍纍若重囚道途觀者無不泣下大輅杖五十謫州判官當下詔獄時其妻黃日夜焚香籲天祈大輅免罪有緝事緹騎居大輅邸旁輒言大輅妻爲咀咒帝大怒並逮黃入獄當廷鞠按指至斷不承鞠者微諷之黃哭曰妾夫被繫妾居邸舍日夜焚香祝天冀皇輿勿出宗社大安則誠有

之寧敢有他意且妾夫小臣能直妾敢愧其爲婦入獄與大輅訣曰妾今有身分不任刑且死矣國恩未報老親弱子君自珍重居五月得釋夫婦出獄都人聚觀稱黃氏鐵夫人也大輅補夷陵州判曰一日食君祿當一日盡職於是釐隱田清積課均徭役建書院公餘與諸生講論文風以振嘉靖初擢江西按察僉事歷遷右副都御史巡撫湖廣屬水旱民多流徙藩封工役繁興諸司告匱大輅停工蠲賦自劾爲民請命朝旨竟與罷歸家居二十七年以文酒自娛聞世變官邪輒不勝憤或撫膺慟哭其父時與布衣友人譙集大輅終日左右侍諸布衣踈踈離席父曰小子禮當如是人謂其是父是子大輅子敦復字嗣翁用蔭官光祿署正歷工部郎中都勻知府以平寇功擢貴州副使

馬明衡字子萃莆田人思聰子也正德甲戌進士授南京太常博士改爲御史纔十日卽論救給事中鄧繼曾會有旨昭聖皇太后壽曰免命婦朝賀明衡抗疏言國家以孝治天下每遇萬壽聖節則文武羣臣畢賀於外

福建列傳

明七

八

皇太后聖節則命婦入賀於內所以昭福德之休而盡臣子忠愛之極也夫暫免朝賀在恆時則可在議禮更紛之時則不可此意若出於皇太后則必有因事抑鬱生今昔之感不可不有以慰之若出於聖意則陛下母子至情有加無已豈以皇太后令節而忍輟此盛禮哉孝宗皇帝臨御天下十有八年深仁厚澤貫匝人心父老至今道及時或流涕則其懷戀昭聖皇太后當何如哉陛下仁孝夙成恩禮之隆宜無不至帝怒與朱泚同得罪閩中學者率以蔡清爲宗明衡獨受業於王守仁閩中有王氏學自明衡始明衡立志勇往以實學爲務嘗曰草木花千葉者無實其花繁者其實鮮云

閩書

郭楠字世重晉江人父濱字本淵幼有至性兄弟七人濱最少父母及諸兄皆鍾愛之父沒諸兄遵遺命欲以家產盡遺之濱固辭逋解金數百濱悉輸私業代償於是家遂貧精岐黃術恆捐貲市藥以應人求嘗言醫活人術也試術以幸其能藏術以顯其功挾術以邀其利皆非活人者也楠

少學易於蔡清登正德甲戌進士知江浦縣巡阡陌行鄉約立社學養孤老禁治中貴徒黨之擾民者御史行部訪察奸民名數泛濫楠請量治一二邑人德之課最入爲御史世宗卽位請召還直臣舒芬王思黃鞏張衍瑞等從之並疏薦章拯周用等乞量移擢用核餉兩廣劾總兵官撫寧侯朱麟貪懦詔戒飭又應詔言四事曰納諫諍任老成卻貢獻均戶田事浚還朝復上疏言陛下卽位數月賢者未必親親者未必賢政令紛拏駭惑衆聽詔嘗許直言無隱今則言官獲罪詔嘗令裁革冗員今則添設如故請退朝之暇延見大臣如祖宗故事且言主事陳嘉言忤中官不宜逮繫帝怒奪其俸旋出按順天等四府知府郭九皋以清軍田忤勦戚巡檢程景貴以獲私鹽忤中官並奏原之諸臣伏闕爭大禮皆得罪楠方按雲南馳疏言人臣事君阿意者未必忠犯顏者未必悖陛下入繼大統以孝宗爲所後之親而張璁倡爲異議桂萼席書方獻夫和之今羣臣伏闕呼號或榜掠殞身或閒關謫戍璁等排異議竊美官上激九重雷霆之威下貽

福建列傳

明七

九

舉朝縉紳之禍所議之禮未足慰先帝在天之靈而號痛之聲已徹九廟不意聖明之朝而忠良獲罪若此乞復生者之職卹死者之家庶以收納人心全君臣之道或曰公巡按在外不疏可也楠曰備員言官朝中有此大事可緘默耶疏上帝大怒遣緹騎逮治下鎮撫獄掠治復廷杖之削其籍六年以災變修省從吏部言量與楠一官得吉水教諭尋陞崑山知縣吳人苦爲糧長名曰折楠斧言其能破家也其所苦皆由富家投充勢要家人纔得概免官不能徵糧長爲納逋稅楠一切持法行之時顧鼎臣家居亦無得濫免遷廣信同知再遷南寧知府峒峒時出掠召峒老諭之立保甲稽其出入又修築銅陵等陂灌溉數百頃尋引疾歸里孫士豪字志邁爲諸生有孝行母喪未葬遇火災趨火中翼棺慟哭欲與俱燼衆爲感動競出棺於燄

黃偉字孟偉同安人少貧嘗就府爲小吏一日歎曰非丈夫也題解壁棄去爲諸生舉鄉試更受業陳琛之門學益進正德甲戌成進士授南京刑

部主事所治獄情法既得執不可奪眼則讀道南四先生書以自勵嘉靖初應詔陳九事論敬德必親賢儒遠近習論輔弼必任老成去軟熟論節用必自裁減貢獻始論除剝民巨蠹必革鎮守他如選臺諫重守令養人才明職掌正體統皆切中治體又上大禮疏斥張璉希寵嗜進妄誕不經又請申明舊制京畿御史不得仰部抄奉案驗皆侃侃無諱出知南雄府明禮教去淫祠禁遊女罷不急之徵南雄商賈輻輳郡故有橋稅偉毫無所取按察使檄民舁蘇木署其牌還之巡撫欲丈田加稅屢執不從甫三月卽託疾歸尋起知松江時璉當國而霍韜與偉爲同年生韜諷謁璉偉曰昨出墜馬今病足未能也卽投牒歸家居食貧日惟侍親講學丁父憂三載不入內冠婚喪祭盡革俗禮巡按李元陽行部至謂諸生曰諸生誦法聖賢且學黃先生會歲饑發賑元陽請偉主其事偉旦暮區畫以劇瘁卒祀南雄名宦祠

戴時宗字宗道長泰人祖暉字宏亮有陰德與妻陳置兩筐於坐榻行一

福建列傳

明七

十

善投一錢於左有未愜意者投於右久之其右空而左滿焉父昀字正中以孝聞成化甲午舉人知樂清縣築陂灌田民名爲樂戴陂以侃直棄官歸時宗第正德甲戌進士授刑部主事有錦衣官恃勢殺人匿弗出時宗持之急錦衣自詣尙書所尙書禮之如平時時宗曰法司也乃與囚抗禮由是忤尙書意改獄屬他司旣而調吏部考功武宗南巡疏諫忤旨罰廷跪三日杖三十歷文選郎中塞倖門清選法南京尙書缺時議欲用王瓊時宗獨不署名奏言瓊固有才然以邊方得罪之臣遽復本兵功罪不明無以示天下其持正不阿多類此擢大理少卿世宗嗣位久皇嗣未生行人薛侃奏召藩王入侍帝震怒下法司廷鞫張孚敬欲借以株連不附已者時宗力言侃狂瞽不足深罪用此羅織尤不可直聲大振嘉靖十一年河決魚臺阻運道擢右僉都御史總督河道時宗躬行相視言河東北岸與運河鄰惟西南流者一由孫家渡出壽州一由渦河口出懷遠一由趙皮寨出桃源一由梁橋口出徐州小浮橋往年四道俱塞全河南奔故豐

沛曹單魚臺以次受害今患獨鍾於魚臺宜棄以受水因而道之入昭陽湖過新開河出留城金溝境山乃易爲力值邊警改提督薊州軍務星馳赴鎮勉循將士懸示賞格奏募土著以實行伍未幾罷歸臺諫薦起原官巡撫鄖襄值旱蝗相繼餓殍盈野大發倉穀賑之全活二十餘萬築鄖陽城改置上津縣廟川堡於要地以平竹溪金州賊賜金幣進左僉都御史被誣罷家居時見奸民引倭互市時宗度其必爲患請當路嚴禁之弗聽又以邑城卑陋請濬湟增陴嘉靖三十七年倭果入寇城堅不可攻乃舍去人服其先見時宗少負經濟才老而彌練所至恩澤及民喜爲詩成一家言曾孫耀煒自有傳

鄭慶雲字舜祥南平人正德甲戌進士知潛山縣調南昌時宸濠方恣橫大吏莫敢裁以法慶雲獨不爲撓踰年以異政徵因忤巡按御史被劾事下巡撫覆治王守仁等連疏白其冤且薦之拜南京禮科給事中世宗卽位首劾中官楊琳不法狀報可帝疾率同列疏言自昔聖帝明王自朝至福建列傳明七

士

居內之日常少居外之日常多所以防情欲之過養性命之源上以副天地祖宗社稷臣民之望下以衍子孫千億之福也夫元氣之在人身如木之根如水之源木傷根則枯水傷源則竭人傷元氣則壽命不宏子孫不蕃是以上世之君每謹於此上之則無欲次之則能寡欲寡欲之道惟在於正心宋真德秀之言曰惟學可以養此心惟敬可以存此心惟親近君子可以維持此心伏望陛下以此言爲法不省又疏言陛下自登極以來未嘗不求言矣然聽之者不什一拂之者嘗什九臣子有逆鱗之忠陛下無轉圜之美臣等近因聖體屢爾違和具務學親賢保聖躬數事上陳睿覽奉旨令該衙門知道臣等愚昧不知所謂夫所謂該衙門者六部三法司百職事之屬也故凡銓選禮樂錢穀兵甲刑名土木之事則固其所司存也至於臣等所言皆陛下心身之學非可以外求也此在陛下自知之而自行之該衙門何與焉臣等竊思今日如此之批答非陛下之過司章奏者之過也然其端有二或隱匿不以上聞是謂蒙蔽或票擬不由內

閣是謂攬權夫人主之病莫大於權柄下移而其原必由於羣小蒙蔽乃爲國家大蠹蓋蒙蔽者必攬權苟權一入其手其蒙蔽者益無時而可解武宗皇帝在御十六年天下不得安者其弊正在於此陛下所親見者也奈何今日又忍蹈襲之耶臣等職列諫垣遠在南服凡有見聞不敢隱諱所望於陛下者如日月焉惟恐其虧也伏望陛下自今以後勤萬幾而不聞於旦暮之功俯羣言而不遺乎芻蕘之善言切於身心者務躬行於不怠利於國家者務聽從之必果則君身正而萬事理國家治天下平矣旣而大禮議起慶雲引濮議以爭不聽遂引歸閉門吟嘯如諸生然

以上道光舊志

邱道隆字懋之上杭人正德甲戌進士知順德縣歲饑賑濟多所全活毀淫祠新學舍翦寇盜擢爲御史正德中佛郎機據滿刺加逐其王十三年遣使臣加必丹末等貢方物請封道隆言滿刺加乃勅封之國而佛郎機併之且昭我以利邀求封貢決不可許宜卻其使明示順逆令還滿刺加

福建列傳明七

三

疆土方許朝貢倘執迷不悛必檄告諸番聲討同官何鼇亦言佛郎機凶狡兵械校諸番獨精前歲駕大舶突入廣東會城礮聲殷地留驛者違制交通入都者桀驁爭長若聽其往來貿易勢必爭鬪殺傷南方之禍殆無紀極請悉驅在澳番船疏下禮部言道隆先宰順德鼇卽順德人故深晰利害宜俟滿刺加使臣至處置其他悉如道隆等言道隆又請停浙江織造尋巡按山西督河東鹽課疏請開濬古永豐渠建鹽倉處屯軍補額課言皆碩畫嘉靖初改巡四川有旨舉用人材凡所疏薦如羅欽順呂柟安磐朱希周盛應期皆一時耆宿士論韙之以鯁直觸忌出知南雄府端方持大體僚屬懍懍奉法以親老告歸弟道明道充道明字誠之歲貢生知武城縣寬徭恤刑奉委築臨清城調度得宜歷杭州同知有四年清似水九載暖如春之謠遷應天治中告歸道充亦貢生爲均州州判適興殿工委採木道充徒步入山區畫有法省費千餘金有獄久不決道充齋宿祝天忽有羊入訟庭於人叢中觸突一人執而訊之其人駭服民呼神君遷

灤州知州 閩書萬姓統譜

林遜字元成寧德人弘治辛酉舉人歷安吉象山教諭正德甲戌成進士授南大理評事轉寺副嘉靖初陳八事曰恆敬心遠邪佞容戇直公是非重守令謹刑罰修武備革弊俗帝皆嘉納之轉寺正擢湖廣按察司僉事賑襄河饑仿曾鞏計口授錢法不足則請太和山香錢鎮守中官難之往復抗論卒如請除郎陽部運徵賠之害革柳永老女不嫁之俗創巡司於麻城界河進四川副使稽餉築城防邊並有成績大工採木權貴欲取其餘執不與勞費大省歲饑檄郡縣修學或謂未便遂曰此范文正公遺意也後麥大熟長至丈巡撫欲以瑞進遂曰大寒之後必有陽春何足爲瑞不署名遷貴州參政致仕歸在四川時有獻金甌者卻之民爲建卻金亭鄭漳字世績閩縣人曾祖亮字汝明宣德癸丑進士官戶部主事父伯和字節之弘治辛酉舉人授無爲州學正轉國子博士秩滿當遷吏部郎薛蕙其門人也欲擢伯和他官伯和不樂他徙乃以爲秦府長史一作久之壽府久之福建列傳明七

三

致仕歸伯和未第時以禮經教授從者甚衆歸猶理前業性至孝撫於嫡母林林卒遇忌日必哀哭年踰六十猶然漳正德丁丑進士歷戶部郎中嘉靖中出爲肇慶知府與提學副使蕭鳴鳳相詆訐投劾歸久之起知登州府嘗書真德秀四事十害於屏以自警擢兩淮運使值海潮之變親詣亭場收溺死男婦樁而瘞之與御史議留羨課數萬金以賑且爲築避湖墩於各亭存沒賴焉登州淮南皆爲立祠轉廣西參政改河南吏部尙書李默重其人薦擢按察使歷布政使遷應天府尹入爲刑部侍郎默得罪臺諫承風旨并論漳因乞歸卒漳貌不逾中人狷介寡合大學士夏言漳同年進士也邀漳往見不往卒後所遺惟圖書數卷而已閩書萬姓統譜福州府志

劉世揚字實甫閩縣人正德丁丑進士改庶吉士除刑科給事中世宗卽位議加興獻帝皇號世揚疏諫不報都察院牒司禮監攝中官吳善良帝手批原牒付刑科以善良付司禮世揚言祖宗制凡降詔旨必書於奏題疏揭或登聞鼓狀乃發六科宣於諸曹或國有大事上命先發諸曹必補

贖於次日早朝進之無徑批文贖者今旨從中出褻天語更舊制不可帝不聽已列先朝直臣舒芬馬汝驥王思汪應軫張原等二十人請加恩以旌忠直得旨各進秩一等轉世揚吏科左給事中偕同官劾罷兵部尙書王時中進都給事中又與同官李仁劾詹事顧鼎臣汙佞且言今日詹事卽他日輔臣帝怒詰詹事進輔臣出何典例世揚等引罪帝怒不解予杖下詔獄旣乃得釋張璫桂萼被劾罷帝責諫官不言世揚乃盡劾璫萼黨尙書王瓊而下數十人章下吏部而尙書方獻夫亦璫萼黨也但去編修金潞御史敖鉞太僕丞姚奎郎中劉汝輓員外郎張敬郭憲待詔葉幼學御史儲良材八人而已未幾復偕同官趙漢等陳修省八事中言大學士石瑄貞介歿未易名尙書李鏊國之盜臣身後遺金得諡給事中鄭一鵬坐論楊一清再杖削職一清敗一鵬宜復官會璫再相因珩實前賜諡激帝怒謂給事中言皆妄乃謫世揚江西布政司照磨停漢等俸御史陳察方遷南京太僕寺少卿將行請召用世揚亦坐謫然鏊諡亦由此奪久之

福建列傳 明七

西

稍遷常州通判歷河南提學副使告歸卒世揚內行潔修自期古人雖流落於外而直氣不衰嘗典試山東號稱得人子鶴翔自有傳

閩書明史明

外史劉世揚傳

張經字廷彝侯官人父海字德涵幼孤母蔡氏攜養外家蔡氏絕遂襲其姓海好觀書史過目了大義少時墜水舟人無覺者見老人挾之登舟得不死經狀魁偉有文武才正德丁丑第進士乃復張姓除嘉興知縣嘉靖四年召爲吏科給事中歷戶科都給事中彈劾不避權貴寧夏總兵官种放行賂京師偵事者獲其籍則兵部尙書金獻民名在焉經率同官高世魁劾之獻民引疾去潘墳巡撫河南匿災不報怨聲聞禁中帝切責墳墳歸罪河南守范總爲經所劾詔罷墳七年正月經請罷遣厰衛官校言此屬假勢作威淫刑黷貨譬則虎狼蛇虺遇者無不被其毒噬至於地方之騷擾驛遞之需求又不可勝言帝納之十六年旋進兵部左侍郎總督兩廣軍務斷籐峽賊侯公丁據弩灘爲亂經與御史鄒堯臣等定計以軍事

屬副使翁萬達誘執公丁參議田汝成請乘勢進討於是命副總兵張經此別一張經觔不觔錄大臣同姓名將三萬五千人爲左軍副使萬達監若千而二張經且同時同事尤易混之都指揮高乾將萬六千人爲右軍副使梁廷振監之領指揮王良輔馬文傑等分道抵賊巢夾擊賊奔林岫而東良輔等邀之斬首千三百餘級平南縣有小田羅應古陶思古諸徭亦據險不靖萬達等移師攻之俘其衆招降者二千九百有奇土人言祖父居羅運八世矣未聞官軍涉茲土也捷聞進經左侍郎加秩一級先是安南莫登庸篡位廷臣僉言討之經上言安南進兵之道有六當用三十萬一歲之餉當用百六十萬造舟車市馬制器犒軍諸費又須七十餘萬況我調大衆涉炎海與彼勞逸殊勢不可不審處也尋與毛伯溫定計撫定之再進右都御史平思恩九土司及進兵部尙書鎮守如故副使張瑤等討馬平徭屢敗帝罪瑤而有經給事中周怡劾經經乞罷不允以憂歸服闋起南京戶部尙書改兵部三十年朝議以倭寇猖獗設總督大臣命經解部總督江南江北浙江山東福建列傳明七

福建湖廣諸軍便宜行事時廷議欲徵狼土兵勦寇以經總督兩廣有威惠爲狼土兵所戴故有是命經亦慷慨自許然經素貴倨諸大將何卿沈希儀等名位已極老而氣驕新參諸將又慄猾往果退速連戰不利望實稍損朝命逮應天巡撫屠大山黜爲民責經久戰無功改經右都御史兼兵部右侍郎代大山專辦賊倭二萬餘據柘林川沙窪其黨方踵至經曰選將練兵爲擣巢計以江浙山東兵屢敗欲待狼兵至用之三十四年正月賊犯乍浦海寧陷崇德轉掠杭西江南人苦倭久口語籍籍罪經玩寇帝怒切責剋期勦賊工部侍郎趙文華督師新至意甚銳有所負挾頤指經而經以大臣自重出其上文華恚甚會寇犯浙江文華督戰益急經曰賊狡且衆侍永保兵至夾攻庶萬全文華再三言經守便宜不聽又念兵事祕不以語文華文華益恚謂經輕已遂疏劾經養寇糜財帝怒卽下詔逮經方文華拜疏時永保兵已至其日卽有石塘灣之捷五月朔倭數千人水陸奄至突犯嘉興經領浙兵擣賊巢於松江永保兵亦破倭川沙窪

倭出海東遁去已聞倭犯嘉興經乃分遣參將盧鏗督保靖兵總兵俞大猷督永順兵由泖湖趨平望參將楊克寬引舟師由中路擊之合戰於王江涇斬賊首一千九百餘級焚溺死者無算自軍興以來稱戰功第一捷聞給事中李用敬閭望雲言王師大捷倭氣奪不宜易帥請召還錦衣使者帝大怒曰經欺誑不忠聞文華劾方一戰用敬等黨奸杖五十斤爲民已而帝疑以問嚴嵩嵩言徐階李本江浙人皆言經養寇不戰文華宗憲合謀進勦經冒以爲功帝深入其言經既至備言進兵始末且言任總督半載前後俘斬五千乞賜原宥帝終不納適刑部郎中何鰲論經死奏上遂與巡撫李天寵俱斬都市舉朝冤之三十四年十月也隆慶初經孫懋爵詣闕訟冤乃復故官賜諡襄愍仍與懋爵蔭

正氣堂集明外史闕書明史道光舊志

陳毓賢字則英長樂人正德丁丑進士歷工部郎中嘉靖三年命濬漕渠毓賢疏請於寶應高郵湖隄建閘十座以殺水勢略言寶應汜光湖往來糧船入湖三十餘里湖隄舊基俱土石築成高湖面不過三尺許隄西湖

福建列傳

明七

六

勢高隄東田勢下惟賴一隄障水而已且西有天長六合泗州諸處地多高陡一遇積雨卽時瀰漫加以黃河水漲又由淮口橫奔不時衝決非惟漕運有妨而寶應鹽城興化通泰諸州縣民田渰沒饑荒隨至此江北第一患惟於高郵隄迤東修築越河庶可免風波之患擢陝西布政司左參議分守關西道增築平涼夾城歲饑請留京折多方賑貸轉山西按察司副使兵備冀北道流民嘯聚山谷爲寇鄉導毓賢招撫之悉解散代王左右欲冀北鑿河溉莊田毓賢不可遷廣西左參政平右江獍狔亂督撫方薦之未上卒

材公輔字質夫長樂人第正德丁丑進士授大理評事詳刑謹細不以一字苟喜怒十四年三月帝將南巡極諫死杖下醫無完膚流血漬街砌世宗立贈太常丞賜祭福王追諡忠恪

以上道光舊志

陳文沛字維德長樂人先姓林正德丁丑進士授工部主事歷郎中正德末有建議修蘇松水利者進李充嗣工部尙書兼領之未幾世宗嗣位遣

文沛及顏如璋佐充嗣開白茅港起常熟縣東倉至雙廟一萬七千三百九十二丈又於白茅上流濬倘湖昆承陽縣各湖爲港爲涇爲漚者凡十有九文沛日暴露風日中故役夫用命又疏吳淞江六閱月而訖工海溢圯海鹽塘命文沛督修築天關諸塘舊制石多縱少橫文沛使縱橫交錯南抵宋莊通新舊隄一千三百丈勞勩數月未嘗受有司餽餉又督邊儲皆有功詔增俸出知撫州府調蘇州所至治最擢山東按察司副使遷陝西行太僕卿文沛剛介有執楊一清胡世寧李承勛皆薦其可用吏部尙書汪鋐以私憾擠之遂罷家居二十餘年子時範字敷疇嘉靖辛丑進士清約端慎有父風授戶部主事遷刑部郎中出知夔州府蜀人以三殿採木大困爲之蠲豁存活數千家遷雲南按察使厯左右布政使藩帑積羨金五千以充大比費餘貯藏中一無所取

閩書

張曰韜字席珍莆田人正德丁丑進士授常州推官武宗南巡江彬縱其黨橫行州縣將抵常州民爭欲亡匿時知府暨武進知縣咸入覲曰韜兼福建列傳

明七

七

緝府縣印召父老約曰彬黨至若等併力與格又釋囚徒令與丐者各具瓦石待已而彬黨果累騎來父老直遮之境上四常州比歲災物力大屈無可啗若曹府中惟一張推官一錢不入卽欲具芻秣亦無以辦言已囚徒乞兒奮呼還至飛石飄瓦爭中其額項皆走還馳使告彬曰韜亦上書巡按御史言狀御史東郊行部過常州謂曰事迫矣彬將以他事縛君命曰韜登已舟先發自以小舟尾之彬黨果大至索曰韜誤截御史舟郊使嚴捕截舟者而陰令緩之其黨恐御史上聞咸散去曰韜遂免彬亦戒其黨毋擾由是常以南諸府得安世宗卽位召爲御史楊廷和等之爭織造也曰韜亦上言陛下旣稱閣臣所奏惟愛主惜民是明知織造之害矣旣知之而猶不已實由信大臣弗專而羣小爲政也自古未有羣小朦蔽於內而大臣能盡忠於外者崔文輩二三小人嘗濁亂先朝今復蒙惑聖衷竊弄威福陛下奈何任其逞私不早加斥逐哉臣聞織造一官行金數萬方得之旣營之以重貲而欲其不責償於下此必無之事也帝不能用三